

Date – 03/09/2024
Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Mizoram sorkarin tuialhthei man atanga VAT chhiah lak a tihpun hnuah vawiin atangin petrol leh diesel rate thar hman tan a ni.**

- 2. MNF Party chuan Mizoram State Commission for Women Chairperson chu dan loa ruat a nih thu sawiin, bang turin an phut.**

- 3. President Draupadi Murmu-i chuan ramchhunga zirna in tinah hmeichhia te tana himna ngaih pawimawh a tul thu a sawi.**

- 4. Prime Minister Narendra Modia chuan vawiin khan Brunei a thleng**

<><><>

TAXATION PRESS CONF

Mizoram sorkarin tuialhthei man atanga VAT chhiah lak a tihpun hnuah vawiin atangin rate thar hman tan a ni a.

Sorkar thuchhuah tarlan danin, diesel-a chhiah zaa 5.23 lak thin chu zaa 10-ah tihsan a ni a, petrol-a chhiah zaa 16.36 lak thin chu zaa 18-ah tihsan a ni a, petrol leh diesel-ah hian Social Infrastructure & Services Cess cheng 2 leh Road Maintenance Cess cheng 2 lak a ni bawk a ni. Chhiah pun anih hnuah hian Petrol pangngai cheng 93.93 chu cheng 99.24 ah a pung a, a to belh na chu cheng 5.31 a ni a, Diseal hi cheng 80.46 atang in cheng 88.02 ah a pung a, a to belh na chu cheng 7.74 a ni.

Taxation Minister Dr Vanlalhlana chuan Petrol leh Diesel atanga VAT tihpun in nghawng a neih tur leh mipui ten harsatna an tawh theih tur thil tam tak ngaihtuah lawk a ti an ni a, Mizoram mipuite tana tha ber tur ngaihtuah chung a ti an ni tih sawiin sorkar dinhmun hrethiam chung a chhiah pun chu pawm thiam turin mipuite a ngen tih a sawi.

Vawiina a pisa-a Press Conference ah he thu hi sawiin Dr Vanlalhlana chuan Petrol leh Diesel atanga VAT tihpun hian, a man chu sang viau angin lang mah se kum 2 kal taa petrol leh diesel man aiin a la hniam zawk a ti a,

Tuialhthei man an pun chhan hi sawifiahin, kumin kum tir lamah Mizoram Resource Mobilisation Committee atangin Petrol leh Diesel man

tisang tur leh November, 2021-a tihhniam a nih hmaa VAT rate hmanga chhiah la leh tura ngenna chu Taxation Department in an dawng a, state dangin an tihsan ve tho avangin Petrol leh Diesel a chhiah tihsan tawp aiin mipui ten an hriatthiam zawk theih nan Road Infrastructure Cess leh Social Infrastructure Service Cess hmanga tih san chhoh ni se tih an rel a ti a, Mizoram tan chuan Petrol leh Diesel atanga Cess lak chu thil thar ni mah se state dangte chuan hming chi hrang hrang hmangin an la reng tawh zawk a ni a ti bawk.

Minister sawi danin Mizoram-a chengten chhiah an pek tam loh avangin VAT rate tihsan tawp aiin a hmanna tur awm saa chhiah tihpunna siam chu a felfai zawk a, mipuiten hrethiam hram turin an ngen a ti.

<><><>

CYMA

Central YMA chuan vawiin khan tunhnaia Social Mediaa Document hrang hrang siam thei ni a insawi chhui chhuak turin Aizawl Police Station ah FIR an thehlut.

Central YMA hruaitute chuan Sawrkar Department leh Sawrkarin a ruat ni lo, mimal anga Document siam thei ni a inchhal te an awm hi paw a tiin a ngai thutak hle tih thuchhuah ah an tarlang a, mipui leh Sawrkar zahlohnaah an ngai tih sawiin ram leh hnam hmelma ni a ngaiin langsar taka sual ngaihnamna niin an ngai tih an sawi bawk.

Central YMA FIR hi President Pu Lalhmachhuana leh hruaitu dang ten Aizawl Police Station ah kalin an thehlut a, OC Pu Deepak Pathak in a lo dawng sawng a ni.

<><><>

MNF PRESS CONF

Mizo National Front (MNF) Legal Board chuan Mizoram State Commission for Women Chairperson Pi Lalchhandami chu dan loa ruat a nih thu sawiin, bang turin an phut.

Vawiin khan Aizawl Press Club-ah Thuthar Lakhawmtute kawmin, MNF Legal Board chuan MSCW Act 2004 hnuaia Dan siamah Chairperson atan kum 65 pel tawh chu ruat theih a nih loh thu chiang takin a inziak a, Sorkar document hrang hrang leh Kohhran record-ah Pi Lalchhandami hian Chairperson atana ruat a nih hian kum 68-na a hmang mek tawh tih chiang takin a lang a ni an ti a.

Hei bakah hian MSCW member 7 zinga 3 te chu an hun la tawplovin anmahni pawhin banna an la thehlut lo chungin thlahlui August ni 28 khan notification luahlanin, member 7 an ruat hnan leh a ni an ti a, hetianga dan bawhchhia-a MSCW Chairperson ruat mai duh tawh loa, member dinglaite pawh midang ruat hnan an nihna hi a ruattu, ZPM Sorkar hian an hunbi tiam chhunga sut ve ve turin MNF Legal Board chuan a ngen an ti.

MNF Legal Board hian September ni 9 tlai dar 5 hmaa Pi Lalchhandami MSCW Chairperson atanga ban leh MCSW member ruatna notification sut an phut a; an beisei anga bawhzuina a awm loh chuan a tawp thlengin hma an lak tur thu an sawi.



MEGA OIL PALM PLANTATION

Kolasib district Buhchangphai ah Mega Oilpalm Plantation drive, 2024 neih a ni a.

Mega Oilpalm Plantation Drive inkhawm Buhchangphai Hall a neih chu Agriculture & Farmers Welfare Department Jt. Director Pu George Lalthannguran kaihruiin, he hun hmanpuitu Kolasib DC Pu Robert C Lalhmangaiha chuan thu sawiin, Oilpalm chingtute chu an vannei a an la vannei dawn chauh a ni a ti a, theihtawp chhuaha tan la zel turin kuthnathawktute chu a fuih a. Hetianga mission mode-a oilpalm hmalakna kalpui a ni chu lawmawm a tih thu sawiin, kuthnathawktute hlawhtlinna atan district administration atanga inpuih theihna a awm chuan theihtawp chhuah a inhuam thu a sawi bawk.

Agriculture Dept Dy. Director Pu R. Vanlalchhuanga chuan Mega Oilpalm Plantation Drive chu central sorkar ruahmanna a nih thu leh, India ramin hriak ei chi a a intodelhna tura hmalakna a ni a ti a, chumi atan chuan Oilpalm chin chu nasa zawka hmalak zel theihna tura ruahmanna a nih thu a sawi.

Hei bakah hian Kolasib district-a Buhchangphai khua leh Mamit district-a Darlak leh Nalzawl khua chu central sorkarin Oilpalm hmalakna ah NEH Special scheme atangin khaw thlan bik an nih avangin heng khua atanga Oilpalm chingtu te chu he scheme atang hian a bika enkawlina leh tanpuina chihrang hrang an dawn tur thu a sawi bawk.

Kolasib leh Mamit district a Oilpalm te leikhawmtu Godrej Agrovet Company Sr, Executive Officer Pu Lalruatkima pawhin he hunah hian thu sawiin, Oilpalm hi Oil pechhuak thei thlai zingah chuan oil ngah ber a nih thu sawiin, Mizoram a Oilpalm hlawhtlinna avangin tunah chuan thenawm state hrang hrang te pawhin Godrej Agrovet enkawlpuina hnuaiah nikum atang khan Oilpalm hi an phun tan ve mek tih sawiin, North East ah hian Oilpalm hi farmer level mai ni lo, business angin kan kalpui tan tawh a ni, a ti.

Tun dinhmunah Kolasib leh Mamit District-a oilpalm huan nei a rah hralh mi 744 vel awmin nikum chhung khan Oilpalm atangin cheng nuai 700 vel an la lut a, kuminah hian nuai 800 vel an beisei tih a sawi bawk.



HNAHTHIAL HIV/AIDS

Hnahthialah District AIDS Prevention & Control Committee (DAPCC) chuaihawtin Intensified IEC Campaign "India Fight Against HIV & STI" vawiin khan neih a ni a hemi pual hian HIV/AIDS dona pual kawngzawh DC office atanga Bazarkawn thleng neih a ni.

Kawngzawhnaah hian Govt Hnahthial College, Higher Secondary School thenkhat leh Hnahthial khawpui chhunga High School-a zirlaite naupang te an tel a ni..

Rally hma hian DC office kawtah inkhawm tawi buatsaih a ni a. District Bawrhsap Pi Rita Lalnunmawii Pachuau, Chairman District AIDS Prevention & Control Committee (DAPCC) Hnahthial ni bawk chuan HIV/AIDS hi natna hlauhawm tak tihdamna la awm lo a ni anih avangin mipat hmeichhiatna hmang duhdah lova drugs lakah te fihlim turin kalkhawmte chu a chah a. Ruihlo hrang hrang mihringin an tih tanna chu zuk leh hmuam a nih vangin

zirlai naupangte chu hetiang lakah hian fihlim turin a chah a. Zirlai naupang kalkhawmte chu ruihtheih thil, zu leh hmuam laka fihlim a, khawtlang leh ram tana khua leh tui tha ni theuh tur a chah baw a ni. HIV/AIDS dona kawngah zirlaite chu a pawimawh hle thu sawiin programme dang tam tak siam a la ni dawn a, chutah chuan chuan zirlaite tel vek turin a sawm nghal baw a ni.

Rally tawp nan Bazarkawn-ah kharna hun hman niin Dr. R. Lalsanglura, District AIDS Control Officer (DACO) Hnahthial in lawmthu sawina hun hmangin District AIDS Prevention & Control Committee in programme hrang hrang a duan te a tarlang baw a ni. Kawng zawhah hian Hnahthial Addl DC, SP leh Addl. SP te pawh an tel a ni.

<><><>

PRESIDENT

President Draupadi Murmu-i chuan ramchhunga zirna in tinah hmeichhia te tana himna ngaihpaawimawh a tul thu a sawi. Vawiina Pune-a Symbiosis University Convocation a hmanpuinaah he thu hi sawiin Pi Murmu-i chuan hmeichhiate chu ram hmasawnaah an pawimawh em avangin himna tura hmalak ngei a tul a ti a. Symbiosis University ten mipa leh hmeichhe intluktlanna tura huapzo hmasawna inclusive development an kalpui chu lawmawm atih thu sawiin gold medalist 11 zingah hmeichhia pariat lai an awm chu ropui a tih thu a sawi baw a ni.

Vawiina Convocation programme ah hian Maharashtra Governor C.P Radhakrishnan leh State Higher and Technical Education Minister Chandrakant Patil te pawh an tel a. Symbiosis University ah hian ram 85 atangin zirlai an awm a ni.

<><><>

PM

Prime Minister Narendra Modia chuan vawiin khan Brunei a thleng. Bandar Seri Begawan-ah vawiin chawhnu khan ropui taka lo lawm a ni a. Tun tumah hian PM Modia hian Brunei leh Singapore tlawh turin a zinchhuak a. Brunei-ah hian Crown Prince Haji Al-Muhtadee Billah chuan Brunei International Airport ah a lo hmuak a. Tun tum hi India Prime Minister-in Brunei a tlawh hmasak ber a ni.

PM Modia hian a zinchhuah hmam thuchhuah siamin Brunei leh Singapore a tlawh tur chuan India nena ram pahnihte thawhdunna a tih chak tur thu leh ASEAN ramte thlenga nghawng tha tak a neih a beisei thu a sawi a. Act East Policy leh Indo-Pacific Vision ah te heng ram pahnihte hi an paiwmawh hle a ti a. Brunei nena inlaichinna in kum 40 hmel a hmu tur chu lawmawm a tih thu sawiin lal chhungkuate nen inkawmna hun tha tak an neih a beisei thu a tarlang baw a ni.

<><><>